




01

Broj: 10-02-10934-1/17  
Datum: 04.10.2017. godine



SKUPŠTINA UNSKO-SANSKOG KANTONA  
n/r SEKRETARA SKUPŠTINE

PREDMET: Zakon o studentskom standardu, dostavlja se

Na 29. redovnoj sjednici Skupštine Unsko-sanskog kantona održanoj 10.04.2017. godine odgođen je pretres o prijedlogu Zakona o studentskom standardu zbog uočenih tehničkih nedostataka prijedloga zakona i neusaglašenosti s Mišljenjem Ministarstva finansija Unsko-sanskog kantona.

Ministarstvo obrazovanja, nauke, kulture i sporta ispravilo je navedene tehničke nedostatke, te je ugradilo u zakon amandman Vlade Unsko-sanskog kantona koji time postaje sastavni dio ovog zakona.

Amandman koji se odnosi na finansijska izdvajanja sredstava za finansiranje rada studentskih organizacija Ministarstvo obrazovanja, nauke, kulture i sporta je uputilo na razmatranje Vladi Unsko-sanskog kantona uz prijedlog da se usvoji manji iznos sredstava u odnosu na prvobitno predloženi jer se radilo o izdvajanju iz ostvarenih vlastitih prihoda JU Univerzitet u Bihaću.

Kako je pretres o prijedlogu Zakona o studentskom standardu na osnovu člana 125. stav (1) Poslovnika Skupštine Unsko-sanskog kantona odložen, molimo vas da na narednoj sjednici Skupštine Unsko-sanskog kantona isti uvrstite u dnevni red i izvršite pretres navedenog prijedloga Zakona koji vam dostavljamo u prilogu.

-u prilogu: Zakon o studentskom standardu

S poštovanjem,

Dostaviti:

1. Naslovu
2. a/a



MINISTAR  
mr. sci. Muhamed Ramić

*Muhamed Ramić*

## PRIJEDLOG

Na osnovu člana 2. b) Poglavlja IV. i člana 11. b) Odjeljka A. Poglavlja V. Ustava Unsko-sanskog kantona - - Prečišćeni tekst ( „Službeni glasnik Unsko-sanskog kantona“, broj: 5/04 i 11/04), Skupština Unsko-sanskog kantona na \_\_\_\_\_ sjednici održanoj dana \_\_\_\_\_ donijela je

## ZAKON O STUDENTSKOM STANDARDU

### 1.OSNOVNE ODREDBE

#### Član 1.

##### ( Predmet zakona )

Ovim Zakonom uređuju se prava , obaveze i odgovornost, studenata u oblasti studentskog standarda, osnivanje, organizacija i rad ustanova studentskog standarda, finansiranje studentskog standarda i studentskih udruženja, osnivanje studentskih udruženja i drugih studentskih organizacija, nadzor nad provođenjem ovog Zakona, kao i druga pitanja u oblasti studentskog standarda.

#### Član 2.

##### ( Studentski standard )

(1) Studentski standard, u smislu ovog Zakona, je organizirana djelatnost kojom se u oblasti visokog obrazovanja osiguravaju dodatni uvjeti za dostupnije, efikasnije i kvalitetnije obrazovanje studenata.

(2) Studentski standard ima za cilj stvaranje materijalnih, kulturnih, socijalnih, zdravstvenih i drugih uvjeta kojima se potiče stjecanje obrazovanja, društvena uključenost i svestrani razvoj ličnosti studenata.

#### Član 3.

##### (Prava u oblasti studentskog standarda)

(1) Student ima pravo na:

- a) smještaj
- b) ishranu
- c) studentsku stipendiju
- d) studentski kredit
- e) stipendiju za izuzetno nadarene studente
- f) zdravstveno osiguranje

g) kulturne, umjetničke, sportske i rekreativne aktivnosti i informiranje

h) studentsko organiziranje

#### **Član 4.**

##### **(Opšti uvjeti za ostvarivanje prava u oblasti studentskog standarda)**

(1) Prava iz člana 3. stav (1) ovog Zakona imaju studenti visokoškolskih ustanova čiji je osnivač Unsko-sanski kanton.

(2) Prava iz člana 3. stav (1) ovog Zakona mogu ostvariti studenti na svim javnim visokoškolskim ustanovama u Bosni i Hercegovini na studijskim linijama koje nisu integrisane u sklopu Univerziteta u Bihaću, a čije je prebivalište Unsko-sanski kanton.

(3) Prava iz člana 3. stav (1) ovog Zakona mogu ostvariti studenti strani državljani ukoliko se redovno školuju na visokoškolskoj ustanovi čiji je osnivač Unsko-sanski kantona, u skladu sa međunarodnim ugovorom.

(4) Student iz osjetljivih društvenih grupa i djeca šehida, ratnih vojnih invalida, djeca demobilisanih boraca, studenti iz materijalno ugroženih porodica, djeca bez roditeljskog staranja, jednoroditeljske porodice, Romi, lica sa invaliditetom, lica sa hroničnim bolestima), ostvaruje prava iz člana 3. stav (1) ovog Zakona, pod uvjetima utvrđenim ovim Zakonom i primjenom blažih kriterija, koje u skladu sa ovlaštenjima iz ovog Zakona propisuje ministar Ministarstva obrazovanja, nauke, kulture i sporta ( u daljem tekstu: ministar).

(5) Student sa posebnim potrebama ostvaruje pravo na odgojni rad, odnosno smještaj u ustanovu studentskog standarda, uz uvažavanje njegovih posebnih potreba.

#### **Član 5.**

##### **(Obavljanje djelatnosti)**

(1) Djelatnost u oblasti studentskog standarda obavljaju ustanove studentskog standarda ( u daljem tekstu : ustanova ), u skladu sa ovim Zakonom.

(2) Na osnivanje i rad ustanova iz stava (1) ovog člana primjenjuju se propisi o ustanovama.

## **II. PRAVA, OBAVEZE I ODGOVORNOST STUDENATA**

#### **Član 6.**

##### **(Pravo studenata na smještaj i ishranu)**

(1) Pravo na smještaj u ustanovi za smještaj studenata ima student koji ispunjava opće uvjete iz člana 4. ovog Zakona i čije prebivalište nije u općini sjedišta visokoškolske ustanove na kojoj studira.

(2) Ukoliko smještajni kapaciteti to dopuštaju, pravo na smještaj u ustanovi za smještaj studenata mogu ostvariti studenti visokoškolskih ustanova čiji osnivač nije Unsko-sanski kanton ili jedinica lokalne samouprave, koji sami finansiraju svoje školovanje, po ekonomskoj cijeni koju utvrđuje upravni odbor ustanove uz saglasnost Ministarstva obrazovanja, nauke, kulture i sporta (u daljnjem tekstu: Ministarstvo).

(3) Pravo iz stava (1) ovog člana ostvaruje student na osnovu konkursa koji se raspisuje, najkasnije tri mjeseca prije početka akademske godine, odnosno za studente drugog i trećeg ciklusa studija - po završetku upisa.

(4) Bliže uvjete, kriterije za utvrđivanje redoslijeda i način ostvarivanja prava studenata na smještaj i ishranu, visinu učešća korisnika prava u troškovima smještaja i ishrane i druga pitanja od značaja za ostvarivanje prava za smještaj i ishranu studenata propisuje ministar.

(5) Izuzetno, ukoliko ne postoji registrirana javna ustanova, Ministarstvo će putem javnog poziva izabrati privatne smještajne kapacitete za ostvarivanje ovog prava.

(6) Uslove koje trebaju ispunjavati smještajni kapaciteti propisuje ministar pravilnikom.

## **Član 7.**

### **(Pravo studenata na ishranu)**

(1) Pravo na ishranu od tri obroka dnevno imaju studenti koji ispunjavaju opće uvjete iz člana 4. Ovog Zakona i čije prebivalište nije u mjestu studiranja.

(2) Pravo na ishranu mogu ostvariti i studenti visokoškolskih ustanova čiji osnivač nije Unsko-sanski kantona, odnosno koji sami finansiraju svoje studije, po cijeni koju utvrđuje upravni odbor ustanove studentskog standarda uz saglasnost Ministarstva.

(3) Odluku o ostvarivanju prava studenata na ishranu iz stava (1) i (2) ovog člana donosi ministar.

(4) Pravo na ishranu studenti ostvaruju u ustanovi studentskog standarda, a u mjestima u kojima nema ustanova studentskog standarda Ministarstvo može zaključiti ugovor o obavljanju poslova ishrane studenata sa organizacijama iz oblasti ugostiteljstva putem javnog poziva i prema kriterijima koje donosi ministar.

## **Član 8.**

### **(Pravo na studentsku stipendiju)**

(1) Pravo na studentsku stipendiju ima student koji ispunjava opće uvjete iz člana 4. ovog Zakona, koji nije gubio nijednu godinu tokom studija, odnosno koji prvi put upisuje akademsku godinu, koji je prema nastavnom programu visokoškolske ustanove na kojoj studira ostvario pravo na upis u narednu akademsku godinu i koji ima prebivalište na teritoriji Unsko-sanskog kantona.

(2) Bliže uvjete, kriterije za utvrđivanje redoslijeda, način ostvarivanja prava na studentsku stipendiju i način vođenja evidencije o odobrenim stipendijama propisuje ministar.

## **Član 9.**

### **(Pravo na studentski kredit)**

(1) Pravo na studentski kredit ima student koji ispunjava opće uvjete iz člana 4. ovog Zakona, koji je prvi put upisan u zimski semestar studija i koji ima prebivalište na teritoriji Unsko-sanskog kantona.

(2) Bliže uvjete, kriterije za utvrđivanje redoslijeda, način ostvarivanja prava na studentski kredit i način vođenja evidencije o odobrenim kreditima, propisuje ministar.

#### **Član 10.**

##### **(Pravo na stipendiju za izuzetno nadarene studente)**

(1) Pravo na stipendiju za izuzetno nadarene studenta ima student počevši od treće godine studija, odnosno sa ostvarenih 120 ECTS bodova (osnovne akademske studije, master akademske studije i doktorske akademske studije), koji ispunjava opće uvjete iz člana 4. ovog Zakona, koji tokom studiranja ostvari prosječnu ocjenu najmanje 9,00/4,5.

(2) Bliže uvjete za dodjelu stipendija iz stava (1) ovog člana, kriterije za utvrđivanje redoslijeda kandidata, način i postupak ostvarivanja prava na stipendiju i druga pitanja od značaja za ostvarivanje tog prava propisuje ministar.

#### **Član 11.**

##### **(Pravo na kulturne, umjetničke, sportske i druge aktivnosti i informiranje)**

(1) Radi postizanja boljeg uspjeha u učenju i skladnog razvoja ličnosti studenata, mogu se organizirati kulturne, umjetničke, sportske i rekreativne aktivnosti i informiranje u skladu sa ovim Zakonom.

(2) Poseban oblik aktivnosti iz stava (1) ovog člana su takmičenja: kantonalna, državna i međudržavna.

(3) Bliže uvjete i način ostvarivanja prava iz stava (1) i (2) ovog člana propisuje ministar pravilnikom.

#### **Član 12.**

##### **(Obaveze i odgovornost studenata u ustanovi)**

(1) Student je dužan prava koristiti u skladu sa ovim Zakonom i općim aktom ustanove i odgovorno se odnositi prema imovini, drugim studentima i uposlenima u ustanovi.

(2) Student može odgovarati disciplinski i materijalno.

(3) Student odgovara disciplinski za povredu obaveze koja je u vrijeme izvršenja bila utvrđena ovim Zakonom.

(4) Student koji u ustanovi prouzrokuje materijalnu štetu namjerno ili krajnjom nepažnjom odgovara za štetu, u skladu sa Zakonom.

(5) Postupak za utvrđivanje povrede obaveze i odgovornosti studenta, ustanova vodi primjenom pravila općeg upravnog postupka i okončava se rješenjem.

## Član 13.

### (Povrede obaveza studenata)

- (1) Povrede obaveza studenata mogu biti lakše i teže.
- (2) Lakše povrede obaveza propisuju se općim aktom ustanove, a teže ovim zakonom.
- (3) Teže povrede obaveza studenata;
  - a) zloupotreba prava na smještaj
  - b) zloupotreba prava na ishranu
  - c) ustupanje prava na smještaj i ishranu trećem licu
  - d) ostvarivanje na prava na smještaj i ishranu na osnovu isprava sa neistinitim podacima
  - e) falsificiranje ili prepravljavanje javne isprave na osnovu koje se ostvaruje pravo na smještaj i ishranu.
  - f) izazivanje opasnosti, oštećenje ili uništavanje imovine ustanove, odnosno studenata i uposlenih, namjerno ili krajnjom nepažnjom
  - g) otuđivanje imovine ustanove, odnosno studenata ili uposlenih u ustanovi
  - h) držanje, nošenje i upotreba oružja, odnosno eksplozivnih materija, zapaljivih tečnosti i gasova
  - i) prodaja, ponuda, kupovina radi prodaje, držanje, prenošenje ili posredovanje u prodaji ili kupovini ili na drugi način neovlašteno stavljanje u promet, podstrekavanje i pomaganje u upotrebi supstanci ili preparata koji su proglašeni za opojne droge, odnosno psihoaktivnih supstanci i supstanci koje se mogu upotrijebiti u nezakonitoj proizvodnji opojnih droga
  - j) upotreba opojnih droga, odnosno psihoaktivnih supstanci i alkohola u ustanovi
  - k) nasilničko ponašanje ili izazivanje i učestvovanje u tuči i drugim konfliktima u ustanovi ili na javnom mjestu kojima se ugrožava javni red i mir
  - l) poticanje, organiziranje ili učestvovanje u aktivnostima koje su zabranjene u ustanovi
  - m) iznošenje, oštećenje ili uništavanje evidencije ili unošenje i prepravljavanje podataka u evidenciji koju vodi ustanova
  - n) ponavljanje lakših povreda obaveza i kršenja odredaba kućnog reda odnosno pravila ponašanja u ustanovi.
- (4) Postupak utvrđivanja prekršaja iz stava (2) ovog Zakona propisuje ustanova.

### **III. USTANOVE ZA SMJEŠTAJ STUDENATA**

#### **Član 14.**

##### **(Vrste ustanova studentskog standarda)**

Ustanove studentskog standarda su:

- a) studentski centar – za ostvarivanja prava studenata na smještaj i ishranu
- b) studentski dom – za ostvarivanja prava na smještaj.

#### **Član 15.**

##### **(Djelatnoist ustanova za smještaj i ishranu)**

- (1) Studentski centar je ustanova koja osigurava smještaj i ishranu studenata.
- (2) Studentski dom je ustanova koja osigurava smještaj studenata.
- (3) Smještaj studenata u ustanovama iz stava (1) i (2) ovog člana organizira se odvojeno prema spolu studenata.

#### **Član 16.**

##### **(Osnivanje)**

- (1) Ustanovu može osnovati Unsko-sanski kanton, jedinica lokalne samouprave i drugo domaće ili stano pravno ili fizičko lice.
- (2) Kada je osnivač ustanove Unsko-sanski kanton, akt o osnivanju donosi Skupština Unsko-sanskog kantona.

#### **Član 17.**

##### **(Uvjeti za osnivanje, početak rada i obavljanje djelatnosti)**

- (1) Ustanova se može osnovati ako:
  - a) postoji potreba za smještajem i ishranom studenata, za kulturnim, umjetničkim, sportskim i rekreativnim aktivnostima i informiranjem studenata
  - b) ima osigurana sredstva za osnivanje i rad
- (2) Ustanova može početi sa radom i obavljanjem djelatnosti ako ispunjava uvjete za osnivanje i ima:
  - a) propisani prostor i opremu,
  - b) propisani broj i strukturu uposlenih u radnom odnosu na neodređeno vrijeme,
  - c) osigurane higijensko-tehničke uvjete, u skladu sa Zakonom

(3) Ustanova je dužna u poslovanju sa hranom koristiti uputstvo za dobru proizvođačku i higijensku praksu i primjenu standarda, u skladu sa Zakonom kojim se uređuje sigurnost hrane.

(4) Osnivač ustanove ne može biti fizičko lice koje je pravosnažnom presudom osuđeno za krivično djelo za koje je izrečena bezuvjetna kazna zatvora u trajanju od najmanje tri mjeseca ili koje je osuđeno za: krivično djelo nasilje u porodici, oduzimanje maloljetnog lica, zapuštanje i zlostavljanje maloljetnog lica ili rodoskrvuće, za krivično djelo primanje mita ili davanje mita, za krivično djelo iz grupe krivičnih djela protiv spolne slobode, protiv čovječnosti drugih dobara zaštićenih međunarodnim pravom, bez obzira na izrečenu krivičnu sankciju, ni lice za koje u skladu sa Zakonom utvrđeno diskriminatorno ponašanje.

(5) Ustanova se upisuje u sudski registar kad nadležni organ utvrdi da su ispunjeni uvjeti za osnivanje, početak rada i obavljanje djelatnosti.

(6) Upisom u sudski registar ustanova stiče svojstvo pravnog lica.

(7) Bliže uvjete za osnivanje, početak rada i obavljanje djelatnosti ustanova propisuje ministar.

(8) Standarde kvaliteta ishrane studenata propisuje ministar.

(9) Standarde za kategorizaciju objekata studentskog standarda, kategorije objekata i način stjecanja i promjene kategorije objekta propisuje ministar.

## **Član 18.**

### **(Jedinica ustanove)**

(1) Ustanova obavlja djelatnost u svom sjedištu.

(2) Ustanova može obavljati djelatnost i van sjedišta, odnosno u drugom objektu organiziranjem jedinice, ako ispunjava uvjete propisane ovim Zakonom, u skladu sa dozvolom za rad.

(3) Jedinica iz stava (2) ovoga člana nema svojstvo pravnog lica.

## **Član 19.**

### **(Dozvola za rad)**

(1) Ustanova može početi sa radom i obavljanjem djelatnosti kada se rješenjem utvrdi da ispunjava uvjete za osnivanje, početak rada i obavljanje djelatnosti (u daljnjem tekstu: dozvola za rad).

(2) O zahtjevu za dobivanje dozvole za rad ustanove odlučuje Ministarstvo, najkasnije u roku od tri mjeseca od podnošenja zahtjeva.

## **Član 20.**

### **(Zabrana rada ustanove i oduzimanje dozvole za rad)**

(1) Ustanovi se oduzima dozvola za rad kada joj se zabrani rad, u skladu sa Zakonom.



(2) Kada organ nadležan za vršenje inspekcijskog nadzora utvrdi da ustanova ne ispunjava propisane uvjete za rad ili ne obavlja djelatnost na propisani način, odrediće joj rok za ispunjenje uvjeta, odnosno otklanjanje nepravilnosti u obavljanju djelatnosti i o tome će obavijestiti osnivača.

(3) Ako ustanova ne otkloni utvrđene nepravilnosti iz stava (2) ovog člana u određenom roku, Ministarstvo će rješenjem zabraniti rad ustanove i oduzet će dozvolu za rad.

(4) Rješenje iz stava (3) konačno je u upravnom postupku.

(5) Ministarstvo će o zabrani rada ustanove i oduzimanju dozvole za rad obavijestiti osnivača.

(6) Studenti koji su smješteni u ustanovu kojoj je zabranjen rad imaju pravo na smještaj i ishranu u tekućoj školskoj godini u drugoj ustanovi koju odredi Ministarstvo.

(7) Nakon što rješenje postane pravosnažno ustanova se briše iz registra nadležnog suda i registra koje vodi Ministarstvo.

## **Član 21.**

### **(Odgovornost ustanove za sigurnost studenata i uposlenih)**

(1) Ustanova je dužna propisati mjere, način i postupak zaštite i sigurnosti studenata u ustanovi, u saradnji sa nadležnim organom jedinica lokalne samouprave i drugim nadležnim organima i službama.

(2) Dom odnosno centar osigurava stalnu dostupnost uposlenika.

(3) Ustanova je dužna provoditi mjere iz stava (1) ovog člana i sa sadržajem mjera upoznati studente na način utvrđen općim aktom ustanove.

(4) Ustanova je dužna osigurati sigurnost i zaštitu na radu uposlenih u skladu sa Zakonom kojim se uređuje sigurnost i zdravlje na radu.

## **Član 22.**

### **(Pravila ponašanja u ustanovi)**

(1) U ustanovi se njeguju odnosi međusobnog razumijevanja i uvažavanja ličnosti studenata i uposlenih.

(2) Uposleni imaju obavezu da svojim radom i ukupnim ponašanjem doprinose razvijanju pozitivne atmosfere u ustanovi.

(3) Pravila ponašanja u ustanovi propisuje upravni odbor ustanove, polazeći od principa: tolerancije, međusobne saradnje i uvažavanja, nenasilnog rješavanja sukoba, poštovanja privatnosti i njegovanja različitosti.

## **Član 23.**

### **(Zabrana diskriminacije, nasilja i zlostavljanja u ustanovi)**

- (1) U ustanovi su zabranjene aktivnosti kojima se na otvoren ili prikričen način ugrožavaju, omalovažavaju ili diskriminiraju grupe i pojedinci po bilo kom osnovu, a naročito po osnovu rase, spola, nacionalne pripadnosti, društvenog porijekla, rođenja, vjeroispovijesti, političkog ili drugog uvjerenja, imovnog stanja, kulture, jezika, uzrasta, seksualne orijentacije, psihičkog ili fizičkog invaliditeta, konstitucije ili se potiče na takvo ponašanje.
- (2) Ne smatraju se diskriminacijom posebne mjere uvedene radi postizanja pune ravnopravnosti, zaštite i napretka lica, odnosno grupe lica koja se nalaze u nejednakom položaju.
- (3) U ustanovi je zabranjeno vrijeđanje, nasilno ponašanje i zlostavljanje.

## **Član 24.**

### **(Zabrana oružja, eksplozivnih i drugih materijala, opojnih droga i alkohola u ustanovi)**

U ustanovi nije dozvoljeno držanje, nošenje i upotreba oružja, odnosno eksplozivnih materijala, zapaljivih tečnosti i plinova, kao i prodaja, ponuda, kupovina radi prodaje, držanje, prenošenje ili posredovanje u prodaji ili kupovini ili na drugi način neovlašteno stavljanje u promet, podstrekavanje i pomaganje u upotrebi supstanci ili preparata koji su proglašeni za opojne droge, odnosno psihoaktivnih supstanci i supstanci koje se mogu upotrijebiti u nezakonitoj proizvodnji opojnih droga, kao i upotreba alkohola.

## **Član 25.**

### **(Zabrana stranačkog i vjerskog organiziranja i djelovanja u ustanovi)**

U ustanovi je zabranjeno stranačko ili vjersko organiziranje i djelovanje i korištenje prostora u te svrhe.

## **Član 26.**

### **(Statut ustanove)**

- (1) Ustanova ima statut.
- (2) Statut je osnovni opći akt ustanove, kojim se bliže uređuju organizacija, način rada, upravljanje i rukovođenje u ustanovi i druga pitanja, u skladu sa Zakonom.

## **Član 27.**

### **(Razvojni plan ustanove)**

- (1) Ustanova ima razvojni plan.
- (2) Razvojni plan ustanove sadrži: srednjoročni cilj razvoja ustanove, prioritete u obavljanju djelatnosti, plan aktivnosti i nosioce aktivnosti i druga pitanja od značaja za razvoj ustanove.

(3) Razvojni plan donosi upravni odbor, na prijedlog direktora ustanove, za period od četiri godine.

(4) Ustanova je dužna razvojni plan ustanove dostaviti Ministarstvu na saglasnost.

### **Član 28.**

#### **(Godišnji plan rada)**

(1) Ustanova donosi godišnji plan rada, kojim se utvrđuje: vrijeme, mjesto, način organizacije rada i nosioci ostvarivanja programa rada, za odgovarajuću akademsku godinu.

(2) Godišnji plan rada donosi upravni odbor ustanove na osnovu razvojnog plana.

(3) Godišnji plan rada ustanova donosi do 30.septembra.

### **Član 29.**

#### **(Prekid rada u ustanovi)**

(1) Ustanova može prekinuti rad u slučaju više sile i drugim slučajevima kojima su ugroženi sigurnost i zdravlje studenata i uposlenih.

(2) Odluku o prekidu rada donosi upravni odbor ustanove i o tome obavještava osnivača odnosno Ministarstvo.

### **Član 30.**

#### **(Saradnja i povezivanje ustanova)**

(1) Radi unapređivanja obavljanja djelatnosti studentskog standarda, ustanove saraduju i mogu se udruživati, u skladu sa Zakonom.

### **Član 31.**

#### **(Registar ustanova i drugih organizacija)**

(1) Ministarstvo vodi evidenciju (u daljem tekstu: registar)

a) ustanova

b) drugih organizacija koje obavljaju pojedine poslove iz djelatnosti studentskog standarda.

(2) Podaci koji se u registru vode o ustanovi obuhvataju i druge djelatnosti koje ustanova obavlja.

(3) Sadržaj i način vođenja registra propisuje ministar.

## **Član 32.**

### **(Evidencija koju vode ustanove)**

- (1) Ustanove vode evidenciju i izdaju isprave studentima, u skladu sa Zakonom.
- (2) Studentski centar vodi: knjigu matične evidencije o studentima i registarski karton studenta.
- (3) Studentski centar, na osnovu knjige matične evidencije o studentima, studentu izdaje studentsku legitimaciju, odnosno elektronsku karticu.
- (4) Ustanove iz stava (1) ovog člana trajno čuvaju knjige matične evidencije o studentima, a ostalu evidenciju 10 godina.
- (5) Ustanove iz stava (1) ovog člana dužne su evidenciju voditi u pismenoj i elektronskoj formi i podatke upisane u evidenciju dostavljati Ministarstvu.
- (6) Sadržaj i način vođenja evidencije i izgled i sadržaj studentske legitimacije, odnosno elektronske kartice, kao i način i rokove dostavljanja podataka iz evidencije Ministarstvu, propisuje ministar.

## **Član 33.**

### **(Podaci o evidencijama)**

Evidencije koje vodi ustanova sadrže podatke o ustanovi, studentima i uposlenima.

## **Član 34.**

### **(Podaci o ustanovi)**

Podaci o ustanovi su podaci u vezi sa pravni statusom ustanove, odnosno statusom ustanove u sistemu studentskog standarda, podaci o obavljanju osnovne djelatnosti (smještaju, ishrani, kulturne, umjetničke, sportske i rekreativne aktivnosti i informiranje), obavljanju druge djelatnosti, razvojnom i godišnjem planu rada i drugim aktima ustanove, organima ustanove, objektu i radnim jedinicama ustanove, dozvoli za rad i kategorizaciji ustanove.

## **Član 35.**

### **(Evidencija o studentu)**

- (1) Evidenciju o studentu čine podaci kojima se određuje njegov identitet ( u daljnjen tekstu: lični podaci), obrazovni, socijalni i zdravstveni status.
- (2) Lični podaci o studentu su: ime i prezime studenta, jedinstveni matični broj građana, spol, datum rođenja, mjesto, općina i država rođenja, adresa, mjesto, općina i država stanovanja, kontakt telefon i državljanstvo.

(3) Lični podaci o roditelju ili staratelju su: ime i prezime roditelja ili staratelja, jedinstveni matični broj građana, spol, datum rođenja, mjesto, općina i država rođenja, adresa, mjesto, općina i država stanovanja, kontakt telefon, odnosno elektronska adresa.

(4) Podacima kojima se određuje obrazovni status studenta su podaci o: upisanoj visokoškolskoj ustanovi, trajanju obrazovanja, odnosno studijskom programu, upisanoj godini studija, godini upisa, statusu, postignutom uspjehu i izrečenim disciplinskim mjerama.

(5) Podaci kojima se određuje socijalni status studenta su: podaci o stanju porodice (broj članova porodičnog domaćinstva, da li su roditelji živi, njihov obrazovni nivo, zaposlenje, prihodi, primanja socijalne pomoći) i podaci o pripadnosti osjetljivoj društvenoj grupi, podaci o korištenju prava na smještaj, ishranu, podaci o izdanoj studentskoj legitimaciji, odnosno elektronskoj kartici, podaci o korištenju studentskog kredita i stipendije i stipendije za izuzetno nadarene studente.

(6) Podaci kojima se određuje društveni status su: podaci o zdravstvenom statusu studenta koje unosi izabrani ljekar nadležne zdravstvene ustanove, na osnovu kojih se vrši procjena potreba za pružanjem dodatne zdravstvene ili socijalne podrške.

### **Član 36.**

#### **(Evidencija o uposlenima)**

Evidenciju o uposlenim čine slijedeći podaci: ime i prezime uposlenika, jedinstveni matični broj građana, spol, datum rođenja, mjesto, općina i država rođenja, adresa, mjesto, općina i država stanovanja, kontakt telefon, nivo i vrsta obrazovanja, podaci o stručnom usavršavanju, podaci o državljanstvu, psiho – fizičkoj i zdravstvenoj sposobnosti za rad sa studentima i provjeri tih sposobnosti, podatak o neosuđivanosti, podaci o vrsti radnog odnosa, odnosno angažiranja i stažu osiguranja, podaci o stručnom ispitu i licenci, podaci o zaduženjima, plati i učešću u radu organa ustanove.

### **Član 37.**

#### **(Način prikupljanja podataka za evidencije o studentima)**

(1) Podaci u evidencijama prikupljaju se na osnovu dokumentacije koju, na zahtjev studenta izdaju nadležni organi, a u svrhu ostvarivanja prava iz oblasti studentskog standarda.

(2) Naročito osjetljivi podaci obrađuju se uz pristanak lica koji se daje u pismenom obliku, u skladu sa Zakonom koji se uređuje zaštita ličnih podataka.

### **Član 38.**

#### **(Vođenje evidencije)**

(1) Prikupljeni podaci čine osnov za vođenje evidencija u ustanovi, odnosno Ministarstvu.

(2) U pogledu vođenja evidencija primjenjuje se Zakon kojim se uređuje zaštita ličnih podataka.

## **Član 39.**

### **(Obrada podataka)**

- (1) Podatke o ustanovi, odnosno drugoj organizaciji koja obavlja pojedine poslove i djelatnosti iz studentskog standarda za potrebe vođenja registra ustanova i drugih organizacija prikuplja Ministarstvo.
- (2) Podatke o studentima- za evidenciju za ostvarivanje prava na smještaj, ishranu prikuplja ustanova i dostavlja Ministarstvu podatke o broju korisnika.
- (3) Podatke o studentima- za evidenciju o odobrenim stipendijama i stipendijama za izuzetno nadarene studente prikuplja Ministarstvo.
- (4) Podatke o uposlenim prikuplja ustanova i dostavlja Ministarstvu.
- (5) U postupku ostvarivanja prava iz oblasti studentskog standarda zabranjeno je objavljivati javno na rang listi lične podatke o studentima: jedinstven matični broj građana – studenta, adrese njihovog stanovanja, brojeve telefona, kao i naročito osjetljive podatke o studentima.

## **Član 40.**

### **(Imovina ustanova)**

O upravljanju i raspolaganju imovinom koju koriste ustanove čiji je osnivač Unsko-sanski kanton ili jedinica lokalne samouprave stara se predstavnik osnivača, odnosno nadležno Ministarstvo.

## **IV. ORGANI USTANOVE**

## **Član 41.**

### **(Organi ustanove)**

- (1) Organi ustanove su: direktor i upravni odbor.
- (2) U ustanovi čiji je osnivač drugo pravno ili fizičko lice uvjeti za imenovanje upravnog odbora, njegov mandat i sastav, kao i uvjeti za direktora, njegov mandat i razlozi za prestanak dužnosti, uređuju se osnivačkim aktom i statutom ustanove.

## **Član 42.**

### **(Upravni odbor)**

- (1) Predsjednika i članove upravnog odbora ustanove imenuje i razrješava osnivač.
- (2) Upravni odbor ustanove čiji je osnivač Unsko-sanski kanton imenuje i razrješava Vlada.
- (3) Upravni odbor se imenuje na period od četiri godine.

(4) Postupak imenovanja predsjednika i članova upravnog odbora pokreće se najkasnije tri mjeseca prije isteka mandata predsjednika i članova upravnog odbora.

(5) U upravni odbor ustanove nemože biti imenovano lice:

a) koje je na funkciji u državnom organu ili organu jedinica lokalne samouprave, odnosno čiji su poslovi nespojivi sa obavljanjem poslova u upravnom odboru ustanove

b) koje je već imenovano u organ uprave druge ustanove iz studentskog standarda

c) koje je osuđivano pravosnažnom presudom za krivično djelo za koje je izrečena bezuvjetna kazna zatvora u trajanju od najmanje šest mjeseci

d) kome je izrečena mjera zaštite od nasilja u porodici

e) u drugim slučajevima u skladu sa Zakonom

(6) Predsjednik i članovi upravnog odbora ustanove imaju pravo na naknadu.

### **Član 43.**

#### **(Upravni odbor ustanova studentskog standarda)**

(1) Upravni odbor studentskog centra ima pet članova uključujući i predsjednika, od kojih su dva predstavnici osnivača, jedan predstavnik univerziteta iz sjedišta ustanove, jedan predstavnik studenata i jedan predstavnik uposlenih u ustanovi.

(2) Predstavnike univerziteta predlaže univerzitet čiji je osnivač Unsko-sanski kanton u skladu sa općim aktom univerziteta.

(3) Predstavnike studenata predlaže Unija studenata Unsko-sanskog kantona.

(4) Predstavnike uposlenih predlažu uposleni većinom glasova ukupnih broja uposlenih.

### **Član 44.**

#### **(Nadležnost upravnog odbora)**

(1) Upravni odbor ustanove:

a) donosi statut i druge opće akte ustanove

b) donosi razvojni plan i godišnji plan rada i usvaja izvještaj o njihovom ostvarivanju

c) donosi finansijski plan ustanove

d) usvaja godišnji plan javnih nabavki ustanove

e) usvaja izvještaj o poslovanju i završni račun

f) podnosi osnivaču izvještaj o poslovanju

g) raspisuje konkurs, obrazuje konkursnu komisiju i daje prijedlog za imenovanje direktora ustanove

h) odlučuje o pravima, obavezama i odgovornostima direktora

i) razmatra rezultate rada i poduzima mjere za poboljšanje uvjeta i rezultata rada ustanove

j) obrazuje drugostepenu disciplinsku komisiju

k) obavlja i druge poslove u skladu sa Zakonom, aktom o osnivanju i statutom

(2) Radom upravnog odbora rukovodi predsjednik.

(3) Upravni odbor donosi odluke većinom glasova ukupnog broja članova.

(4) Sjednici upravnog odbora prisustvuje i učestvuje u radu predstavnik reprezentativnog sindikata u ustanovi, bez prava odlučivanja.

(5) Rad upravnog odbora uređuje se poslovníkom.

#### **Član 45.**

##### **(Razrješenje predsjednika i članova upravnog odbora)**

(1) Osnivač ustanove razriješiće, prije isteka mandata, pojedine članove, uključujući i predsjednika ili upravni odbor u cjelini:

a) na lični zahtjev

b) ako član upravnog odbora neopravdano odsustvuje sa sjednica ili nesavjesnim radom onemogućava rad upravnog odbora

c) ako u postupku preispitivanja akta o imenovanju utvrdi nepravilnosti

d) ako ovlašteni predlagatelj pokrene inicijativu za razrješenje člana upravnog odbora zbog prestanka osnova po kojem je imenovan u upravni odbor

e) ako upravni odbor donosi nezakonite odluke ili ne donosi odluke koje je na osnovu zakona i statuta dužan donositi

f) u drugim slučajevima u skladu sa Zakonom

(2) Novoimenovanom članu upravnog odbora mandat traje do isteka mandata upravnom odboru u cjelini.